

**Emir Dautović, delegat u Domu naroda
Parlamenta Federacije Bosne i Hercegovine**

Sarajevo, 24. 1. 2024.godine

PARLAMENT FEDERACIJE
BOSNE I HERCEGOVINE

DOM NARODA
n/r Tomislav Martinović, predsjedavajući

Bosna i Hercegovina
Federacija Bosne i Hercegovine
PARLAMENT FEDERACIJE
SARAJEVO

Primljeno: 26-01-2024			
Org. jed.	Broj	Priloga	Vrijednost
02-	02-	323	124

B

**PREDMET: NACRT ZAKONA O SPORTU U FEDERACIJI BOSNE I
HERCEGOVINE - dostavlja se**

Na osnovu člana 155. Poslovnika o radu Doma naroda Parlamenta Federacije Bosne i Hercegovine („Službene novine Federacije BiH“, br. 27/03, 21/09 i 24/20), kao ovlašteni predlagač, podnosimo radi razmatranja i prihvatanja, **NACRT ZAKONA O SPORTU U FEDERACIJI BOSNE I HERCEGOVINE.**

DELEGAT


Emir Dautović

NACRT

ZAKON

O SPORTU U FEDERACIJI BOSNE I HERCEGOVINE

Sarajevo, januar 2024.godine

ZAKON O SPORTU U FEDERACIJI BOSNE I HERCEGOVINE

DIO PRVI - OPĆE ODREDBE

Član 1. (Predmet Zakona)

Ovim zakonom uređuje se sport u Federaciji Bosne i Hercegovine (u daljnjem tekstu: Federacija), javni interes i ciljevi nadležnosti Federacije; osnovni principi u organiziranju sporta; prava i obaveze sportista; domaća i međunarodna sportska takmičenja drugih nivoa administrativnog organiziranja u Federaciji: priredbe, izgradnja, održavanje i korištenje sportskih objekata; ostvarivanje međunarodne saradnje; organiziranje i rad ustanova u oblasti sporta; sportske aktivnosti lica sa invaliditetom; nagrade i priznanja sportistima i sportskim organizacijama; zdravstvena zaštita sportista; sprečavanje i suzbijanje svih oblika nasilja i nedoličnog ponašanja gledalaca; korištenje nedozvoljenih stimulativnih sredstava u sportu; stručni rad; naučno-istraživački rad i informatika u sportu; finansiranje sportskih aktivnosti, nadzor i krivične odredbe.

Član 2. (Rodna ravnopravnost izraza u ovom zakonu)

Izrazi korišteni u ovom zakonu, a koji su radi preglednosti dati u jednom gramatičkom rodu, bez diskriminacije se odnose i na muškarce i na žene.

Član 3. (Definicija sporta)

Sport, u smislu ovog zakona, obuhvata:

- a) sportske aktivnosti i igre organizirane radi postizanja sportskih dostignuća koja se ostvaruju prema utvrđenim pravilima (sportska takmičenja i sportske priredbe),
- b) sportske aktivnosti i igre koje se organiziraju s ciljem unapređenja zdravlja ili rekreacije (sportska rekreacija, sport za sve),
- c) sportske aktivnosti organizirane za lica sa invaliditetom,
- d) organizirani školski i univerzitetski sport.

Član 4. (Javni interes)

Sport u Federaciji je djelatnost od javnog interesa.

Član 5. (Međunarodna zasnovanost)

Sport u Federaciji zasniva se na principima i standardima utvrđenim u: Evropskoj povelji o sportu, Evropskoj konvenciji o zaštiti ljudskih prava i osnovnih sloboda, Konvenciji UN-a o pravima djeteta, Međunarodnoj konvenciji protiv dopinga u sportu, Evropskoj konvenciji o nasilju i nedoličnom ponašanju gledalaca na sportskim priredbama, Olimpijskoj povelji, Paraolimpijskoj povelji, pravilima međunarodnih sportskih asocijacija, Evropskom kodeksu o sportskoj etici, Deklaraciji o sportu, toleranciji i fer pleju, te Izjavi iz Lozane o organiziranju sporta u Bosni i Hercegovini.

Član 6.
(Decentralizacija)

- (1) Sport u Federaciji organizira se na decentraliziran način sa utvrđenim pravima i nadležnostima Federacije, kantona i drugih nivoa administrativnog organiziranja.
- (2) U skladu sa ustavima kantona i drugim nivoima administrativnog organiziranja, te njihovim zakonima o sportu, reguliraju se i pitanja iz oblasti sporta koja nisu regulirana ovim zakonom.

POGLAVLJE I. OSNOVNI PRINCIPI U SPORTU

Član 7.
(Osnovni principi organizacije sporta)

Osnovni principi na kojima se organizira sport u Federaciji su:

- a) prava i slobode sportista;
- b) afirmacija duha olimpizma;
- c) jednaka dostupnost sporta bez obzira na rasu, boju kože, nacionalnu ili etničku pripadnost, socijalni status, vjersko, političko ili drugo uvjerenje, invaliditet, zdravstveni status, dob, spol, rod, seksualnu orijentaciju, rodni identitet ili bilo koje drugo lično svojstvo. Zabranjena je diskriminacija u sportu u skladu sa Zakonom o zabrani diskriminacije („Službeni glasnik BiH“, br. 59/09 i 66/16) i Zakonom o ravnopravnosti spolova u Bosni i Hercegovini - prečišćeni tekst („Službeni glasnik BiH“, br. 32/10);
- d) ravnopravno učešće muškaraca i žena u sportu;
- e) zabrana raspirivanja mržnje i netrpeljivosti na osnovu nacionalne ili etničke pripadnosti, boje kože, vjerskog, političkog ili drugog uvjerenja, spola, seksualne orijentacije, invaliditeta, rodnog identiteta, jezika ili nekog drugog ličnog svojstva;
- f) ostvarivanje javnog interesa države u ovoj oblasti i obaveza državnih organa da zakonima i na drugi način, materijalnom podrškom i programima razvoja stvaraju opće i posebne uvjete za sportske aktivnosti, sportsko napredovanje i usavršavanje, materijalnu i društvenu stimulaciju za ostvarivanje vrhunskih sportskih rezultata;
- g) organiziranje efikasnog sistema stručnog osposobljavanja i usavršavanja stručnih kadrova u sportu;
- h) osiguravanje zdravstvene zaštite sportista i sprečavanje upotrebe nedozvoljenih stimulativnih sredstava;
- i) stručnost u radu i podsticanje naučno-istraživačkog rada, primjena savremenih metoda rada, informatike i izdavačke djelatnosti;
- j) pravilo da se svi sporovi između sportista, sportskih organizacija i organa rješavaju isključivo putem i unutar odgovarajućih sportskih organa i arbitražnih sportskih tijela;
- k) autonomnost sportskih organizacija u pogledu uređivanja unutrašnjih odnosa i udruživanja.

POGLAVLJE II. JAVNI INTERES I CILJEVI FEDERACIJE U SPORTU

Član 8.
(Javni interes i ciljevi)

Javni interes i ciljevi Federacije u sportu su:

- a) razvijanje svijesti građana, posebno mladih i lica sa invaliditetom o sportu i njegovim vrijednostima;
- b) doprinos odgoju, obrazovanju i razvoju djece i omladine;
- c) podsticanje i afirmisanje sporta i njegovih vrijednosti kao dijela kulture i ukupnih materijalnih i duhovnih vrijednosti društva;

- d) očuvanje zdravlja kao osnove svake ljudske aktivnosti, radne produktivnosti, izražavanje stvaralaštva i humanog življenja;
- e) podsticanje sistematskog i organiziranog bavljenja sportom u slobodno vrijeme;
- f) prezentacija vrhunskog sportskog stvaralaštva na svim nivoima;
- g) sistemsko stvaranje uvjeta za ostvarivanje vrhunskih sportskih rezultata;
- h) organizacija sistema takmičenja u skladu sa pravilima međunarodnih sportskih federacija.

Član 9.

(Strategija razvoja sporta i programa razvoja u Federaciji)

- (1) Radi ostvarivanja javnog interesa i ciljeva u sportu u Federaciji se donosi Strategija razvoja sporta Federacije Bosne i Hercegovine (u daljnjem tekstu: Strategija).
- (2) Strategija se donosi najmanje za četiri godine (olimpijski ciklus).
- (3) Na osnovu Strategije donose se programi razvoja sporta.

Član 10.

(Sadržaj Strategije)

Strategijom se utvrđuju:

- a) osnovna polazišta i pravci razvoja aktivnosti pri čemu će se voditi računa o ravnopravnosti spolova, kao i osiguranju učešća svih lica i grupa bez obzira na rasu, boju kože, nacionalnu ili etničku pripadnost, socijalni status, vjersko, političko ili drugo uvjerenje, invaliditet, zdravstveni status, dob, spol, rod, seksualnu orijentaciju, rodni identitet ili bilo koje drugo lično svojstvo;
- b) sadržaj i obim sportskih djelatnosti koje se finansiraju, odnosno sufinansiraju iz budžeta Federacije;
- c) razvojni i stručni zadaci u sportu;
- d) okvirni kriteriji za vrednovanje programa i njihovo finansiranje u sportu;
- e) nosioci razvoja i mjere kontrole njegove realizacije.

Član 11.

(Validnost Strategije i programa razvoja)

Strategiju i Program razvoja sporta u Federaciji usvaja Parlament Federacije Bosne i Hercegovine, na prijedlog Vlade Federacije Bosne i Hercegovine.

Član 12.

(Strategije i programi razvoja na nižim nivoima vlasti)

U skladu sa Strategijom, ovim zakonom i drugim zakonskim propisima kantoni i drugi nivoi administrativnog organiziranja donose svoje strategije i programe razvoja sporta.

Član 13.

(Nadležnosti Vijeća za sport Federacije Bosne i Hercegovine)

- (1) Vijeće za sport Federacije Bosne i Hercegovine (u daljnjem tekstu: Vijeće) najviše je savjetodavno tijelo Federalnog ministarstva kulture i sporta (u daljnjem tekstu: Ministarstvo) koje se brine za razvoj i kvalitet sporta na nivou Federacije.
- (2) Vijeće je nadležno za:
 - a) davanje mišljenja o Strategiji,
 - b) davanje mišljenja o Programu razvoja sporta,
 - c) davanje mišljenja o godišnjim planovima i finansijskim potrebama sporta,
 - d) raspravu o pitanjima značajnim za sport, te predlaganje i podsticanje donošenja mjera za unapređenje sporta,
 - e) predlaganje prioriternih projekata, elaborata i studija za njihovo finansiranje u sistemu javnih potreba u sportu;

- f) predlaganje smjernica za izradu propisa o kategorizaciji sportista;
- g) davanje mišljenja i preporuka za nacрте i prijedloge propisa koji se odnose na sport;
- h) obavljanje i drugih poslova utvrđenih ovim zakonom i drugim propisima.

Član 14.

(Imenovanje i sastav Vijeća)

- (1) Vijeće ima ukupno devet članova koje imenuje Vlada Federacije Bosne i Hercegovine (u daljnjem tekstu: Vlada Federacije) na prijedlog federalnog ministra kulture i sporta i to: predsjednika, dva potpredsjednika i šest članova koji se biraju između istaknutih sportista i sportskih radnika. Pri imenovanju osigurat će se ravnopravna zastupljenost spolova. Rodna ravnopravnost postoji ako je u Vijeću jedan od spolova zastupljen najmanje 40%.
- (2) Članove Vijeća predlažu: Ministarstvo dva člana, dva člana kantoni uz konsultaciju sa kantonalnim ministarstvima nadležnim za sport, jedan član sportski savez invalidnih lica, dva člana sportski savez u određenom sportu (loptački), sportski savez u određenom sportu (borilački) i jedan član sportski savez u određenom sportu (ostali sportovi).
- (3) Vijeće se imenuje na četiri godine (olimpijski ciklus).
- (4) Za svoj rad Vijeće je odgovorno Vlada Federacije kojoj najmanje dva puta godišnje podnosi izvještaj o svom radu.
- (5) Administrativne poslove za Vijeće obavlja Ministarstvo.
- (6) Vijeće donosi poslovnik o radu na koji saglasnost daje federalni ministar kulture i sporta.

DIO DRUGI - ORGANIZIRANJE SPORTA

Član 15.

(Nosioци sportskih aktivnosti)

Nosioци sportskih aktivnosti u Federaciji su pravna i fizička lica registrirana za obavljanje sportskih aktivnosti u skladu sa ovim zakonom, Zakonom o udruženjima i fondacijama Bosne i Hercegovine, Zakonom o udruženjima i fondacijama Federacije Bosne i Hercegovine, zakonima o sportu kantona, zakonima o preduzećima Federacije Bosne i Hercegovine i drugih nivoa administrativnog organiziranja u Federaciji.

Član 16.

(Upis u registar)

- (1) Pravna i fizička lica u oblasti sporta upisuju se u posebne registre u skladu sa ovim zakonom, zakonima kantona i drugih nivoa administrativnog organiziranja u Federaciji.
- (2) Pravilnik o vođenju registra pravnih i fizičkih lica u oblasti sporta na nivou Federacije donosi federalni ministar kulture i sporta.

POGLAVLJE I. PRAVNA LICA (SPORTSKA UDRUŽENJA)

Član 17.

(Pravna lica)

Pravna lica u oblasti sporta, u smislu ovog zakona, su:

- a) sportski klub (amaterski i profesionalni),
- b) sportsko društvo,
- c) kantonalni i gradski/općinski sportski savez,
- d) sportski savez u određenom sportu,
- e) sportski klub lica sa invaliditetom (amaterski i profesionalni),
- f) sportsko društvo lica sa invaliditetom,
- g) sportski savez invalidnih lica u određenom sportu,

h) ustanove i institucije u oblasti sporta.

Član 18.
(Sportski klub)

- (1) Osnovni oblik organiziranja u sportu je sportski klub.
- (2) Klub može obavljati sportsku aktivnost amaterski i profesionalno.

Član 19.
(Amaterski sportski klub)

Amaterski sportski klub je dobrovoljna nevladina neprofitna organizacija organizirana kao udruženje građana za obavljanje sportske djelatnosti u skladu sa Zakonom o udruženjima i fondacijama Bosne i Hercegovine, Zakonom o udruženjima i fondacijama Federacije Bosne i Hercegovine, ovim zakonom, zakonima o sportu kantona i propisima iz oblasti sporta na odgovarajućem nivou administrativnog organiziranja.

Član 20.
(Način osnivanja amaterskog sportskog kluba)

- (1) Amaterski sportski klub osniva se osnivačkim aktom.
- (2) Amaterski sportski klub mogu osnovati domaća pravna i fizička lica.
- (3) Amaterski sportski klub iz stava (1) ovog člana mogu osnovati najmanje tri fizička lica ili pravno lice.

Član 21.
(Profesionalni sportski klub)

- (1) Profesionalni sportski klub osniva se kao privredno društvo, odnosno preduzeće sa ciljem obavljanja sportske djelatnosti.
- (2) Profesionalni sportski klub osniva se i registrira kao poslovni subjekt kod nadležnog suda u skladu sa Okvirnim zakonom o registraciji poslovnih subjekata u Bosni i Hercegovini ("Službeni glasnik BiH", br. 42/04), Zakonom o registraciji poslovnih subjekata u Federaciji Bosne i Hercegovine ("Službeni novine Federacije BiH", br. 27/05, 68/05, 43/09, 63/14, 32/19 i 85/21), ovim zakonom i zakonima o sportu kantona i drugih nivoa administrativnog organiziranja, kao i statutima sportskih saveza.

Član 22.
(Sportsko društvo)

- (1) Sportski klubovi mogu se udruživati u sportska društva radi uređivanja i ostvarivanja zajedničkih ciljeva i interesa, kao i zajedničkog nastupanja u oblasti sporta.
- (2) Međusobne odnose i prava sportski klubovi udruženi u sportsko društvo reguliraju osnivačkim aktom i drugim aktima sportskog društva.
- (3) Sportsko društvo je nosilac prava na zajednički naziv i zajedničke simbole, ako osnivačkim i drugim aktima nije drugačije određeno.
- (4) Na osnivanje, upis u registar, obavljanje sportskih aktivnosti i sportskih djelatnosti, rješavanje sporova, odgovornost, kao i na druga pitanja u vezi sa radom sportskih društava, dosljedno se primjenjuju odredbe ovog zakona koje se odnose na sportska udruženja, ako ovim zakonom nije drugačije određeno.

Član 23.

(Kantonalni, gradski i općinski sportski savez)

Članovi kantonalnih, gradskih i općinskih sportskih saveza mogu biti pravna lica koja obavljaju sportsku djelatnost u području za koje se osniva kantonalni ili gradski/općinski sportski savez, a sjedište im je na području kantona ili grada/općine.

Član 24.

(Sportski savez u određenom sportu)

- (1) Sportski klubovi u pojedinim sportovima udružuju se u sportske saveze radi ostvarivanja zajedničkih interesa i ciljeva.
- (2) Sportski savezi organiziraju se na nivou Federacije i kantona, a u zavisnosti od razvijenosti sporta i na drugim nivoima administrativnog organiziranja u Bosni i Hercegovini. Za jedan sport na nivou Federacije može se osnovati samo jedan sportski savez.
- (3) Sportski savez Federacije Bosne i Hercegovine osniva se u skladu sa ovim zakonom i Zakonom o udruženjima i fondacijama Federacije Bosne i Hercegovine na osnovu odluka kantonalnih sportskih saveza o dobrovoljnom udruživanju, a u slučaju spora između kantonalnih sportskih saveza odluku o tome donosi Ministarstvo.
- (4) Sjedište sportskih saveza Federacije Bosne i Hercegovine određuje se na osnovu razvijenosti pojedinog sporta, tradicije, masovnosti i kvaliteta određene sportske grane.
- (5) Ako zbog nerazvijenosti sporta ne postoji organiziran sportski savez na nivou kantona, registracija saveza na nivou Federacije za taj sport obaviti će se uz saglasnost Ministarstva, a do ispunjenja uvjeta iz stava (3) ovog člana.

Član 25.

(Nadležnosti sportskih saveza u Federaciji)

Sportski savezi Federacije nadležni su za:

- a) organiziranje i provođenje sistema takmičenja,
- b) zastupanje i predstavljanje sporta u međunarodnim sportskim organizacijama,
- c) pripremanje i nastupanje državnih reprezentacija na zvaničnim međunarodnim takmičenjima,
- d) utvrđivanje programa razvoja u skladu sa Strategijom,
- e) saradnju sa nadležnim sportskim i drugim organima Federacije.

Član 26.

(Sportski klub lica sa invaliditetom)

- (1) Radi organiziranja sportsko-rekreativne aktivnosti i sportskih takmičenja lica sa invaliditetom osnivaju se sportski klubovi lica sa invaliditetom.
- (2) Sportski klub lica sa invaliditetom može obavljati sportsku aktivnost amaterski i profesionalno.

Član 27.

(Amaterski sportski klub lica sa invaliditetom)

Amaterski sportski klub lica sa invaliditetom je dobrovoljna nevladina neprofitna organizacija koja se organizira kao udruženje građana za obavljanje sportske djelatnosti u skladu sa Zakonom o udruženjima i fondacijama Federacije Bosne i Hercegovine i drugim propisima iz oblasti sporta.

Član 28.

(Profesionalni sportski klub lica sa invaliditetom)

- (1) Profesionalni sportski klub lica sa invaliditetom osniva se kao privredno društvo, odnosno preduzeće sa ciljem obavljanja sportske djelatnosti.
- (2) Profesionalni sportski klub lica sa invaliditetom osniva se i registrira kao poslovni subjekt kod nadležnog suda u skladu sa Okvirnim zakonom o registraciji poslovnih subjekata u Bosni i Hercegovini ("Službeni glasnik BiH", br. 42/04), Zakonom o registraciji poslovnih subjekata u Federaciji Bosne i Hercegovine ("Službeni novine Federacije BiH", br. 27/05, 68/05, 43/09, 63/14, 32/19 i 85/21), ovim zakonom, kao i statutima sportskih saveza.

Član 29.

(Sportsko društvo lica sa invaliditetom)

- (1) Sportski klubovi lica sa invaliditetom mogu se udruživati u sportska društva radi uređivanja i ostvarivanja zajedničkih ciljeva i interesa, kao i zajedničkog nastupanja u oblasti sporta.
- (2) Sportski klubovi lica sa invaliditetom udruženi u sportsko društvo lica sa invaliditetom reguliraju međusobne odnose i prava osnivačkim aktom i drugim aktima sportskog društva lica sa invaliditetom.
- (3) Sportsko društvo lica sa invaliditetom je nosilac prava na zajednički naziv i zajedničke simbole, ako osnivačkim i drugim aktima nije drugačije određeno.
- (4) Na osnivanje, upis u registar, obavljanje sportskih aktivnosti i sportskih djelatnosti, rješavanje sporova, odgovornost, kao i na druga pitanja u vezi sa radom sportskih društava lica sa invaliditetom dosljedno se primjenjuju odredbe ovog zakona koje se odnose na sportska udruženja, ako ovim zakonom nije drugačije određeno.

Član 30.

(Sportski savez lica sa invaliditetom)

- (1) Sportski savez lica sa invaliditetom organizira se na nivou Federacije i kantona, a u zavisnosti od razvijenosti sporta za lica sa invaliditetom. Za jedan sport na nivou Federacije može se osnovati samo jedan sportski savez lica sa invaliditetom.
- (2) Sportski savez lica sa invaliditetom Federacije Bosne i Hercegovine osniva se u skladu sa ovim zakonom i Zakonom o udruženjima i fondacijama Federacije Bosne i Hercegovine na osnovu odluka kantona, sportskih saveza za lica sa invaliditetom o dobrovoljnom udruživanju, a u slučaju spora između sportskih saveza odluku o tome donosi Vlada Federacije.
- (3) Sjedište sportskih saveza pojedinog sporta za lica sa invaliditetom Federacije određuje se na osnovu razvijenosti pojedinog sporta, tradicije, masovnosti i kvaliteta određene sportske grane.
- (4) Ako zbog nerazvijenosti sporta ne postoji organiziran sportski savez lica sa invaliditetom na nivou kantona, registracija saveza na nivou Federacije za taj sport obaviti će se uz saglasnost Ministarstva a do ispunjenja uvjeta iz stava (2) ovog člana.

Član 31.

(Nadležnosti sportskih saveza lica sa invaliditetom Federacije)

Sportski savezi lica sa invaliditetom Federacije nadležni su za:

- a) organiziranje i provođenje sistema takmičenja,
- b) zastupanje i predstavljanje sporta lica sa invaliditetom u međunarodnim sportskim organizacijama,
- c) pripremanje i nastupanje državnih reprezentacija na zvaničnim međunarodnim takmičenjima,
- d) utvrđivanje programa razvoja u skladu sa Strategijom,
- e) saradnju sa nadležnim sportskim i drugim organima Bosne i Hercegovine i Federacije.

Član 32.
(Udruženja sportske rekreacije)

- (1) Da bi se zadovoljile potrebe građana da održe i poboljšaju zdravlje i psihofizičke sposobnosti i organiziralo vježbanje i bavljenje sportskim aktivnostima u slobodnom vremenu, osnivaju se udruženja sportske rekreacije.
- (2) Udruženja - klubovi sportske rekreacije udružuju se u Savez sportske rekreacije Federacije Bosne i Hercegovine, u skladu sa članom 23. ovog zakona.

POGLAVLJE II. PRAVA I OBAVEZE PRAVNIH LICA

Član 33.
(Sloboda i samostalnost)

Pravna lica - sportska udruženja osnivaju se i organiziraju slobodno i samostalna su u ostvarivanju svojih prava i obaveza, u skladu sa ovim zakonom i Zakonom o udruženjima i fondacijama Federacije Bosne i Hercegovine.

Član 34.
(Sticanje svojstva pravnog lica)

Sportska udruženja stiču svojstvo pravnog lica upisom u registar koji vodi nadležni organ u skladu sa Zakonom o udruženjima i fondacijama Federacije Bosne i Hercegovine na nivou Federacije i drugih nivoa administrativnog organiziranja u Federaciji u sjedištu organizacija.

Član 35.
(Skupština udruženja)

Pravna lica koja su, u smislu ovog zakona, registrirana kao udruženje u oblasti sporta, osim osnivačkog akta i statuta moraju imati skupštinu kao najviši organ udruženja.

Član 36.
(Oblavljanje privredne djelatnosti)

Pravna lica mogu obavljati privredne djelatnosti samo ako je osnovna svrha takvih djelatnosti ostvarivanje ciljeva utvrđenih statutom.

Član 37.
(Radni odnos u sportskim organizacijama)

- (1) Pravna lica mogu zasnovati radni odnos sa sportistima, stručnim radnicima, stručnim i administrativnim osobljem.
- (2) Radni odnos u sportskim organizacijama kao pravnim licima registriranim na nivou Federacije uređuje se ugovorom o radu u skladu sa Zakonom o radu ("Službene novine Federacije BiH", br. 26/16, 89/18 i 44/22).
- (3) Zaposlenici imaju sva prava i obaveze iz radnog odnosa utvrđene Zakonom iz stava (2) ovog člana, kolektivnim ugovorom i ovim zakonom.
- (4) Radni odnos kod sportskih udruženja kao pravnih lica na federalnom i drugim nivoima administrativnog organiziranja uređuje se ugovorom o radu, u skladu sa odgovarajućim propisima na tom nivou.

Odjeljak A. Fizička lica u oblasti sporta

Član 38. (Fizička lica)

Fizička lica u oblasti sporta su sportisti, stručni i sportski radnici.

Član 39. (Sportista)

- (1) Sportista je, u smislu ovog zakona, lice koje se priprema i učestvuje u organiziranim sportskim takmičenjima.
- (2) Sportista ima sva građanska prava utvrđena Ustavom i zakonima Bosne i Hercegovine i Federacije, zakonima i drugim propisima na drugim nivoima administrativnog organiziranja, kao i odredbama ovog zakona.

Član 40. (Vrste sportista)

- (1) Sportista se može baviti sportskim aktivnostima samostalno i u okviru sportskih udruženja.
- (2) Sportista se može baviti sportskim aktivnostima amaterski ili profesionalno.

DIO TREĆI. PRAVA I OBAVEZE SPORTISTA, STRUČNI RAD, ZDRAVSTVENA ZAŠTITA I ANTIDOPING

POGLAVLJE I. PRAVA I OBAVEZE SPORTISTA

Član 41. (Prava sportista)

- (1) Sportista je obavezan pridržavati se općih i posebnih pravila koja su propisana ovim zakonom, pravilima svojih organizacija i pravilima međunarodnih sportskih asocijacija.
- (2) Osim prava iz člana 33. ovog zakona, sportista ima pravo da:
 - a) bude zaštićen od svake vrste duhovnog i fizičkog nasilja, ugrožavanja slobode ljudskog i sportskog integriteta, zdravlja i sportskog dostojanstva,
 - b) koristi sportske objekte i opremu, usluge stručnog rada i zdravstvene zaštite u skladu sa propisima koji to reguliraju,
 - c) na osnovu slobodno izražene volje učestvuje u reprezentativnim selekcijama.

Član 42. (Obaveze sportista)

Sportista je obavezan da:

- a) poštuje norme i pravila sportskog ponašanja,
- b) redovno trenira i učestvuje na takmičenjima,
- c) poštuje sportska pravila, službena lica i gledaoce,
- d) svojim ponašanjem čuva ugled sportskog kolektiva i sredine koju predstavlja,
- e) saraduje sa zdravstvenim službama i posebnim organima koji provjeravaju upotrebu nedozvoljenih stimulativnih sredstava.

Član 43.
(Status vrhunskog sportiste)

- (1) Sportista stiče status vrhunskog sportiste Federacije ako shodno međunarodnim standardima ostvaruje vrhunske sportske rezultate.
- (2) Bliži kriterij za sticanje statusa vrhunskog sportiste utvrđuje se pravilnikom o kategorizaciji sportista koji donosi Vlada Federacije na prijedlog federalnog ministra kulture i sporta.

Član 44.
(Sportista strani državljanin)

- (1) U sportskim takmičenjima u Federaciji mogu učestvovati i strani državljani.
- (2) Prava i obaveze sportista stranih državljana reguliraju se ugovorom sa sportskim udruženjima u skladu sa međunarodnim sportskim pravilima.
- (3) Sportista i sportski stručnjaci strani državljani moraju imati dozvolu za rad od nadležnog državnog organa i registrirati se u Ministarstvu.

POGLAVLJE II. STRUČNI RAD U OBLASTI SPORTA

Član 45.
(Osposobljenost za stručni rad)

- (1) Stručne poslove u oblasti sporta mogu obavljati isključivo stručna lica osposobljena za rad u sportu.
- (2) Stručna lica moraju ispunjavati sljedeće uvjete:
 - a) imati visoku ili višu stručnu školsku spremu iz oblasti sporta i tjelesnog odgoja, ili
 - b) imati visoku ili višu školsku spremu iz drugih oblasti i licencu za rad u oblasti sporta, ili
 - c) imati status vrhunskog sportiste sa diplomom za rad u oblasti sporta.
- (3) Školovanje kadrova za rad u sportu i tjelesnom odgoju, te izdavanje diploma za rad u sportu obavljaju visokoškolske ustanove.
- (4) Stručno usavršavanje i osposobljavanje u sportu obavljaju visokoškolske ustanove i ustanove registrirane za poslove stručnog usavršavanja i osposobljavanja.

Član 46.
(Vrste stručnih poslova)

Stručni poslovi u sportu, u smislu ovog zakona, su:

- a) planiranje i realiziranje sportskih aktivnosti djece i omladine,
- b) planiranje i realiziranje sportske obuke,
- c) planiranje i treniranje sportista,
- d) obučavanje građana u sportskim znanjima i vještinama,
- e) planiranje i realiziranje sportske rekreacije građana,
- f) dijagnosticiranje i provjera psihofizičkih i motoričkih sposobnosti učesnika,
- g) planiranje i izvođenje korektivne gimnastike,
- h) provođenje pravila u sportu,
- i) informatika u sportu,
- j) menadžment i marketing u sportu,
- k) naučno-istraživačke djelatnosti.

Član 47.
(Stručna lica sa licencom)

Sudije, delegati i sportski radnici su stručna lica koja imaju licence sportskog saveza da mogu obavljati određene aktivnosti u sportu.

POGLAVLJE III. ZDRAVSTVENA ZAŠTITA U SPORTU I ANTIDOPING KONTROLA

Član 48.

(Obavezna zdravstvena zaštita)

- (1) Zdravstvena zaštita je obavezna za sve učesnike u sportu.
- (2) U sportskim takmičenjima može učestvovati samo lice za koje je utvrđena opća i posebna zdravstvena sposobnost koju utvrđuje ovlašteni ljekar specijalista sportske medicine.

Član 49.

(Uvjeti za obavljanje zdravstvenih pregleda)

Uvjete za obavljanje zdravstvenih pregleda sportista, te način vođenja evidencije i medicinske dokumentacije sportista propisuje federalni ministar zdravstva, uz mišljenje Ministarstva, u skladu sa propisima međunarodnih sportskih federacija.

Član 50.

(Zabrana dopinga)

Sportistima i svim učesnicima u sportu zabranjeno je da uzimaju nedozvoljena stimulativna sredstva, da ih daju, kao i da podstiču njihovo korištenje u skladu sa pravilima Svjetske antidoping agencije (WADA).

DIO ČETVRTI. SPORTSKA TAKMIČENJA I PRIREDBE, SPORTSKI OBJEKTI I SUZBIJANJE NEDOLIČNOG PONAŠANJA NA SPORTSKIM PRIREDBAMA

Član 51.

(Cilj sportskih takmičenja)

Sportska takmičenja i priredbe (manifestacije, susreti, smotre, igre) organiziraju se sa ciljem afirmacije i popularizacije sporta i ostvarivanja vrhunskih sportskih rezultata.

Član 52.

(Sistem, uvjeti i organizacija takmičenja)

- (1) Sportski savezi Federacije utvrđuju sistem, uvjete i organizaciju sportskih takmičenja na nivou Federacije u skladu sa odredbama ovog zakona i pravilima međunarodnih sportskih asocijacija.
- (2) Federalni sportski savez utvrđuje sistem, uvjete i organizaciju sportskih takmičenja na nivou Federacije.

Član 53.

(Usklađenost sa Evropskom konvencijom)

Organiziranje sportskih takmičenja i priredbi mora biti usklađeno sa preporukama Evropske konvencije o suzbijanju nasilja i nedoličnog ponašanja gledalaca na sportskim priredbama, posebno na fudbalskim utakmicama i odgovarajućim zakonima i drugim propisima u Bosni i Hercegovini i Federaciji.

Član 54.

(Međunarodna sportska takmičenja)

U Federaciji se mogu organizirati međunarodna sportska takmičenja i priredbe:

- a) olimpijske i paraolimpijske igre,

- b) svjetska i evropska prvenstva,
- c) univerzijade,
- d) mediteranske igre,
- e) svjetski kupovi i završni turniri evropske i svjetske lige,
- f) zimski i ljetni olimpijski festival mladih Evrope,
- g) balkanska i druga regionalna prvenstva,
- h) kriterijski i kvalifikacioni međunarodni sportski turniri, tradicionalne međunarodne sportske manifestacije koje su u kalendaru međunarodnih sportskih asocijacija.

Član 55.

(Saglasnost za međunarodna takmičenja)

Međunarodna sportska takmičenja i sportske priredbe mogu se organizirati u Federaciji ako organizator dobije saglasnost Ministarstva i Ministarstva civilnih poslova Bosne i Hercegovine, te osigura uvjete predviđene pravilima međunarodnih sportskih organizacija.

Član 56.

(Sportski objekt)

- (1) Sportski objekt je, u smislu ovog zakona, višenamjenski otvoren ili zatvoren prostor namijenjen obavljanju sportskih aktivnosti.
- (2) Sportski objekt, osim prostora namijenjenog obavljanju sportskih aktivnosti, mora imati neophodne prateće sadržaje i opremu te biti pristupačan licima sa invaliditetom.
- (3) Sportski objekti moraju ispunjavati propise međunarodnih sportskih asocijacija kao i standarde propisane odgovarajućim zakonima i drugim propisima.

Član 57.

(Kategorizacija sportskih objekata)

Na nivou Federacije, u skladu sa međunarodnim standardima, vodi se evidencija o kategorizaciji sportskih objekata u skladu sa posebnim pravilnikom o kategorizaciji sportskih objekata koji će donijeti ministarstarstvo nadležno za sport.

Član 58.

(Sportski objekti od interesa za Federaciju)

- (1) Finansiranje izgradnje, održavanje, evidencija i korištenje sportskih objekata od interesa za Federaciju regulira se posebnim sporazumom između institucija Federacije i vlasnika objekta.
- (2) Posebnim pravilnikom koji donosi federalni ministar kulture i sporta, nakon usaglašavanja sa kantonalnim ministarstvima nadležnim za sport, propisat će se uvjeti za utvrđivanje sportskih objekata od interesa za Federaciju.

Član 59.

(Suzbijanje nasilja i nedoličnog ponašanja gledalaca na sportskim priredbama)

- (1) Sa ciljem sprečavanja i suzbijanja nasilja i nedoličnog ponašanja gledalaca na sportskim priredbama Federacija i kantoni dužni su preduzeti potrebne mjere u skladu sa Evropskom konvencijom o nasilju i nedoličnom ponašanju gledalaca na sportskim priredbama, posebno na fudbalskim utakmicama.
- (2) Posebnim zakonom utvrdit će se način i mjere za sprečavanje i suzbijanje nasilja i nedoličnog ponašanja gledalaca na sportskim priredbama.

DIO PETI. NADLEŽNI ORGANI ZA SPORT NA NIVOU FEDERACIJE

Član 60.

(Federalno ministarstvo kulture i sporta)

Nadležni organ za poslove sporta na nivou Federacije je Federalno ministarstvo kulture i sporta, u okviru kojeg se formira poseban sektor za sport.

Član 61.

(Nadležnosti sektora za sport)

Nadležnosti sektora za sport iz člana 54. ovog zakona su:

- a) organiziranje i rukovođenje poslovima izrade Strategije,
- b) pripremanje predloga dugoročnih i godišnjih programa razvoja sporta u Federaciji,
- c) predlaganje budžeta sektora za sport koristeći odgovorno budžetiranje,
- d) pripremanje prijedloga pravilnika o kategorizaciji sportista i sportskih objekata,
- e) pripremanje pravilnika o vođenju registra pravnih i fizičkih lica u oblasti sporta na nivou Federacije,
- f) utvrđivanje sadržaja i oblika informacionih sistema o sportu u Federaciji,
- g) ostvarivanje saradnje sa sportskim savezima i drugim organizacijama i institucijama,
- h) definiranje Strategije na međunarodnom planu u oblasti sporta,
- i) obavljanje administrativnih, stručnih i drugih poslova u oblasti sporta u skladu sa ovim zakonom.

Član 62.

(Informatika u sportu)

- (1) Sa ciljem sistematskog praćenja i evidentiranja stanja u sportu, stručnoj, naučnoj i izdavačkoj djelatnosti organizira se jedinstven informacioni sistem u sportu.
- (2) Sadržaj i oblik informacionog sistema utvrđuje sektor za sport Ministarstva, u skladu sa standardima evropske sportske informacione mreže.
- (3) Informacioni sistemi kantona i drugih nivoa administrativnog organiziranja zajedno sa informacionim sistemom Federacije čine jedinstven sistem.
- (4) Sva pravna i fizička lica registrirana za obavljanje sportskih aktivnosti obavezna su voditi evidenciju u skladu sa jedinstvenim informacionim sistemom u sportu.

DIO ŠESTI - FINANSIRANJE SPORTA

Član 63.

(Sredstva za finansiranje)

Sredstva za finansiranje sportskih aktivnosti ostvaruju se:

- a) od članarine,
- b) iz budžetskih sredstava (institucije Bosne i Hercegovine, Federacije i drugih nivoa administrativnog organiziranja),
- c) od donacija i sponzorstva pravnih i fizičkih lica,
- d) iz prihoda od kamata i zakupnina,
- e) od igara na sreću,
- f) iz prihoda stečenih aktivnostima utvrđenim statutom sportske organizacije,
- g) iz drugih prihoda.

Član 64.**(Finansiranje javnog interesa Federacije)**

Javni interes u sportu u Federaciji ostvaruje se sufinansiranjem iz sredstava budžeta institucija Federacije na osnovu Strategije, dugoročnih i godišnjih programa razvoja sporta u Federaciji.

Član 65.

Sredstva za zadovoljavanje potreba i interesa društva iz člana 7. ovog zakona osiguravaju se iz budžeta Federacije u visini najmanje od 0,80 % do 1,00 % ostvarenih poreznih prihoda budžeta Federacije u tekućoj godini.

Član 66.

Program rada i plan utroška sredstava izradit će Sektor za sport pri Ministarstvu na prijedlog sportskih saveza u određenim sportovima Bosne i Hercegovine, sportskih saveza u određenim sportovima Federacije, Sportskog saveza za lica sa invaliditetom Bosne i Hercegovine i Sportskog saveza za lica sa invaliditetom Federacije Bosne i Hercegovine, te će ih dostaviti Ministarstvu najkasnije do kraja novembra tekuće kalendarske godine.

Član 67.

Raspodjelu sredstava iz institucija Federacije za potrebe i interese društva utvrđene članom 7. ovog zakona vrši Sektor za sport pri Ministarstvu na prijedlog sportskih saveza u određenim sportovima Bosne i Hercegovine, sportskih saveza u određenim sportovima Federacije, Sportskog saveza za lica sa invaliditetom Bosne i Hercegovine i Sportskog saveza za lica sa invaliditetom Federacije Bosne i Hercegovine, na osnovu pravilnika o raspodjeli sredstava koji donosi Ministarstvo, a saglasnost na pravilnik dat će Vlada Federacije.

Član 68.

Odobrena sredstva u budžetu Federacije Bosne i Hercegovine raspoređivat će se u omjeru:

- a) 45% odobrenih sredstava usmjeriti za rad državnih reprezentacija i sportista pojedinaca koji predstavljaju Bosnu i Hercegovinu na zvaničnim međunarodnim takmičenjima putem sportskih saveza određenog sporta,
- b) 45% odobrenih sredstava usmjeriti za sportske kolektive - udruženja od interesa za Federaciju,
- c) 10% odobrenih sredstava usmjeriti za izgradnju, rekonstrukciju i održavanje sportskih objekata u Federaciji.

Član 69.**(Olakšice za sportske organizacije)**

Zakonom se utvrđuju posebne olakšice za sportiste i sportske organizacije, a naročito prilikom izgradnje i održavanja sportskih objekata, organizacije velikih sportskih takmičenja, sportskih priredbi, nabavke sportske opreme i u pogledu sistematskih pregleda sportista.

Član 70.**(Olakšice za ulagače sredstava za razvoj sporta)**

U skladu sa Zakonima Bosne i Hercegovine i Federacije iz oblasti porezne politike pravnim i fizičkim licima koja ulažu sredstva u razvoj sporta, uložena sredstva priznaju se kao troškovi i oslobođeni su poreza.

Član 71.
(Federalna nagrada za sport)

Za izuzetan doprinos u razvoju sporta i afirmaciju Federacije bit će utvrđena federalna nagrada za sport. Vlada Federacije će, na prijedlog Ministarstva, donijeti odluku o ustanovljenju federalne nagrade za sport kao i kriterije za njenu dodjelu.

DIO SEDMI. NADZOR NAD PROVOĐENJEM ZAKONA

Član 72.

- (1) Nadzor nad provođenjem ovog zakona i propisa donesenih na osnovu ovog zakona na nivou Federacije vrši Ministarstvo.
- (2) Pitanje upravnog i stručnog nadzora nad kantonalnim i drugim nivoima administrativnog organiziranja vršit će kantonalna ministarstva zadužena za sport a na osnovu posebnih zakonskih i podzakonskih akata.

DIO OSMI. KAZNE NE ODREDBE

Član 73.

- (1) Novčanom kaznom od 5.000,00 KM do 10.000,00 KM bit će kažnjeno za prekršaj pravno lice ako:
 - a) obavlja sportsku djelatnost a nije registrirano u skladu sa članom 14. ovog zakona i upisano u poslovni registar iz člana 15. ovog zakona,
 - b) obavljanje stručnih poslova u sportu povjeri licima koja za to ne ispunjavaju uvjete iz čl. 39., 40. i 41. ovog zakona,
 - c) omogućiti da na sportskom takmičenju učestvuje lice za koje nije utvrđena opća ili posebna zdravstvena sposobnost,
 - d) organizira sportsko takmičenje i sportsku priredbu u Federaciji a ne ispunjava uvjete iz člana 47. ovog zakona,
 - e) organizira međunarodno sportsko takmičenje ili sportsku priredbu bez saglasnosti organa iz člana 49. ovog zakona,
 - f) ne zasnjuje radni odnos sa sportistom, stručnim radnikom, stručnim i administrativnim zaposlenikom u skladu sa članom 31. ovog zakona,
 - g) organu uprave ne dostavi u propisanom roku tražene podatke ili akte u vezi sa postupanjem u upravnom postupku i vršenju upravnog nadzora.
- (2) Novčanom kaznom od 1.000,00 KM do 5.000,00 KM bit će kažnjeno za prekršaj fizičko lice ako:
 - a) se ne pridržava odredaba iz člana 36. ovog zakona,
 - b) se bavi stručnim radom u oblasti sporta a ne ispunjava uvjete iz čl. 39., 40. i 41. ovog zakona,
 - c) ne posjeduje dozvolu za rad iz člana 38. ovog zakona.
- (3) U slučaju ponovnog prekršaja prekršilac će biti kažnjen maksimalnom novčanom kaznom iz st. (1) i (2) ovog člana.

DIO DEVETI. PRIJELAZNE I ZAVRŠNE ODREDBE**Član 74.****(Kontinuitet sportskih organizacija)**

Sportski savezi na nivou Federacije koji su djelovali do donošenja ovog zakona nastavljaju svoj rad i djelovanje s tim što su dužni u roku šest mjeseci od dana stupanja na snagu ovog zakona reorganizirati i uskladiti svoje normativne akte sa odredbama ovog zakona.

Član 75.**(Obaveza donošenja podzakonskih akata)**

Podzakonski akti za provođenje ovog zakona bit će doneseni u roku godinu dana od dana stupanja na snagu ovog zakona.

Član 76.**(Obaveza donošenja usklađenih zakona)**

Nadležni organi kantona i drugih nivoa administrativnog organiziranja u Federaciji dužni su u roku godinu dana od stupanja na snagu ovog zakona donijeti, odnosno uskladiti sa ovim zakonom svoje zakone i propise koji se odnose na oblast sporta.

Član 77.**(Formiranje nadležnih organa za sport Federacije)**

Vlada Federacije formirat će u roku 60 dana od dana stupanja na snagu ovog zakona poseban sektor za sport u Ministarstvu i pokrenut će aktivnosti za imenovanje rukovodilaca.

Član 78.**(Stupanje na snagu)**

Ovaj zakon stupa na snagu osmog dana od dana objavljivanja u "Službenim novinama Federacije Bosne i Hercegovine".

O B R A Z L O Ž E N J E
NACRTA ZAKONA O SPORTU
FEDERACIJE BOSNE I HERCEGOVINE

I. PRAVNI OSNOV

Pravni osnov za donošenje Zakona o sportu Federacije Bosne i Hercegovine sadržan je u dijelu Poglavlju IV. A 5 20 (1) d) kojim je propisano da je Parlament Federacije Bosne i Hercegovine nadležan za donošenje zakona i vršenju funkcija federalne vlasti i u članu 20. Zakona o sportu Bosne i Hercegovine ("Službeni glasnik BiH" br. 27/08,102/09 i 66/16).

II. RAZLOZI ZA DONOŠENJE ZAKONA

Zakon o sportu Bosne i Hercegovine definira sport kao djelatnost od javnog interesa. Članom 75. Zakona o sportu Bosne i Hercegovine („Službeni glasnik BiH“, br. 27/08 od 31. marta 2008.godine) je precizirano da su nadležni organi entiteta i drugih nivoa administrativnog organiziranja u Bosni i Hercegovini dužni u roku godinu dana od stupanja na snagu ovog zakona donijeti, odnosno uskladiti sa ovim zakonom svoje zakone i propise koji se odnose na oblast sporta.

Pošto do danas na nivou Federacije Bosne i Hercegovine nije donesen zakon o sportu Federacije Bosne i Hercegovine, neophodno ga je usvojiti jer sport je javni interes Federacije Bosne i Hercegovine. Naše državne selekcije, reprezentativci, sportaši su najbolji ambasadori naše domovine i veoma je bitno da se ovim zakonom regulira finansiranje sporta na nivou Federacije Bosne i Hercegovine. Usvajanjem ovog zakona bi se omogućilo organizacijama u sportu da na jednostavniji i racionalniji način sarađuju međusobno i na lakši način ostvaruju svoja prava i obaveze.

Usvajanjem ovog zakona Vlada Federacije Bosne i Hercegovine i Parlament Federacije Bosne i Hercegovine bi trajno osigurali materijalnu podršku našim sportistima da putem programa razvoja stvaraju opće i posebne uvjete za sportske aktivnosti, sportsko napredovanje i usavršavanje, materijalnu i društvenu stimulaciju za ostvarivanje vrhunskih sportskih rezultata. Ovaj prijedlog Zakona ima za cilj da trajno osigura materijalu podršku za ostvarivanje vrhunskih sportskih rezultata svih naših državnih reprezentacija i sportista pojedinaca koji predstavljaju Bosnu i Hercegovinu na zvaničnim međunarodnim takmičenjima putem sportskih saveza određenog sporta, za sportske kolektive -udruženja od interesa za Federaciju i za izgradnju, rekonstrukciju i održavanje sportskih objekata u Federaciji kroz poseban fond koji će biti uspostavljen.

Sportski savezi u Bosni i Hercegovini su prema zakonu nadležni za pripremanje i nastupanje državnih reprezentacija na zvaničnim međunarodnim takmičenjima, ali nažalost nemaju odgovarajuću finansijsku podršku državnih i entitetskih institucija kako bi mogli neometano raditi svoj posao. Isti problem je i sportistima pojedincima, sportskim kolektivima-udruženjima od interesa za Federaciju koji često zbog nedostatka finansijskih sredstava nemaju adekvatne uvjete za pripreme i odlazak na velika takmičenja. Zbog toga je važno da se ova djelatnost sportskih saveza u Bosni i Hercegovini trajno finansira iz budžeta institucija BiH i budžeta institucija entiteta, jer je to jedini sistemski način rješavanja ovog problema. Predmetni zakon se odnosi na sve državne reprezentacije i sportiste pojedince koji predstavljaju Bosnu i Hercegovinu na zvaničnim međunarodnim takmičenjima i sportske kolektive-udruženja od interesa za Federaciju i time osiguravamo da se ovo pitanje ne rješava

parcijalne već sveobuhvatno. Ako ovaj zakon ne stupi na snagu u narednom period i dalje ćemo imati problem finansiranja odlaska naših reprezentativnih selekcija, sportista pojedinaca i sportskih kolektiva-udruženja od interesa za Federaciju na velika takmičenja. Nije potrebno trošiti riječi kakvu bi sramotu za državu i sport u cijelosti bila situacija da zbog nedostatka finansijskih sredstava naše selekcije ili pojedinci, sportski kolektivi-udruženja od interesa za Federaciju moraju otkazivati zakazana putovanja i nastupe na takmičenjima. Isto važi i za potrebu izgradnje sportske infrastrukture, jer je to osnovni preduvjet bez kojeg nema razvoja vrhunskog sporta u Federaciji Bosne i Hercegovine i države Bosne i Hercegovine.

U prethodnom periodu imali smo nekoliko primjera koji su ukazivali na hitnost i neophodnost usvajanja zakona o sportu Federacije Bosne i Hercegovine, kao i izmjena Zakona o sportu Bosne i Hercegovine. Svi znamo da je naša ženska košarkaška reprezentacija bila na ivici da otkáže putovanja u Austaraliju na svjetsko prvenstvo zbog nedostatka novca za avio karte, zatim naša ženska odbojkaška reprezentacija koje su zbog nedostatka novca spavale u podrumu umjesto u hotelu. Naša vrhunska mlada plivačica Lana Pudar nema mogućnost da trenira u svom rodnom gradu jer ne postoji adekvatan olimpijski bazen. Zbog ovog svega je neophodno da se usvoji ovaj zakon kako bi se osiguralo trajno finansiranje sporta.

Sport nije bez razloga djelatnost javnog interesa za državu i entitete i moramo konačno početi konkretnim djelima pomagati našim sportistima, a ne samo deklarativno i čestitkama i to obično nakon što pojedine selekcije ili pojedinci kao naša Lana Pudar ostvare veliki uspjeh na međunarodnim takmičenjima.

III. PROCJENA FINANSIJSKIH SREDSTAVA ZA PROVOĐENJE ZAKONA

Za provođenje ovog zakona za pripreme i nastupe naših državnih reprezentacija i sportista pojedinaca koji predstavljaju Bosnu i Hercegovinu na zvaničnim međunarodnim takmičenjima, sportske kolektive-udruženja od interesa za Federaciju i za izgradnju, rekonstrukciju i održavanje sportskih objekata u Federaciji bit će potrebna finansijska sredstva i to u visini najmanje od 0,80% do 1,00% ostvarenih poreznih prihoda budžeta Federacije u tekućoj godini. Sredstva je potrebno osigurati u budžetu Federacije Bosne i Hercegovine na stavci grantovi neprofitnim organizacijama na poziciji Ministarstva kulture i sporta Federacije Bosne i Hercegovine.

Kao što je već navedeno, korist koju bi država i Federacija imale sa adekvatnim finansiranjem nastupa naših državnih reprezentacija i sportista pojedinaca koji predstavljaju Bosnu i Hercegovinu na zvaničnim međunarodnim takmičenjima, sportske kolektive-udruženja od interesa za Federaciju i za izgradnju, rekonstrukciju i održavanje sportskih objekata u Federaciji mnogo je veća od navedenih troškova.

Troškovi finansiranja Fonda za izgradnju, rekonstrukciju i održavanje sportskih objekata u Federaciji Bosne i Hercegovine zavisit će od sporazuma o finansiranju (sufinansiranju federalnog novoa vlasti sa kantonima).